

四庫全書

史部

欽定四庫全書

欽定續通志卷六十四

元紀八

仁宗

仁宗皇帝諱阿裕爾巴里巴特喇武宗母弟也武宗為懷寧王總兵北邊而成宗崩后巴約特氏與左丞相阿固岱等議立安西王阿南達右丞相哈喇哈斯知其謀急遣使迎帝時帝方奉母鴻吉哩氏居懷州使者至即

奉母進發至衛輝抵漳水值大風雪田叟有以孟粥進者近侍卻不受帝曰昔漢光武為寇兵所逼嘗食豆粥大丈夫不備嘗艱阻庸知稼穡艱難命取食之賜叟束帛慰遣之行次邯鄲諭守令曰吾慮衛士不法胥吏科斂重為民困乃命王傳沿途巡察二月辛亥至大都與母入哭盡哀仍出居舊邸朝夕入奠特哈喇哈斯稱疾守宿掖門夜遣人啟曰懷寧王遠不能猝至恐變生不

測當先事而發三月丙辰

丙辰元史作丙寅按成宗紀是年正月丙辰朔則丙寅當

在三月朔旬以外考哈喇哈斯傳云三月朔日列請請  
署后決以三月三日御殿聽政明日迎仁宗入執阿固  
岱等誅之是仁宗之入在三月  
二日不應為丙寅明矣今改 帝率衛士入內召阿固

岱等責以亂祖宗家法命執之鞠問辭服皆伏誅諸王  
庫庫楚伊克圖等曰今罪人斯得太子寶世祖之孫宜  
早正天位帝曰王何為出此言彼惡人潛結宮壺構亂  
我家故誅之豈欲作威覲望神器耶懷寧王吾兄也正  
位為宜乃遣使迎武宗於北邊五月乙丑帝與母會武  
宗於上都武宗即位立帝為皇太子受金寶乃遣使四

方旁求經籍識以玉刻印章命近侍掌之時有進大學  
行義者命詹事王約等節而譯之帝曰治天下此一書  
足矣因命與圖象孝經列女傳並刊行以賜近臣尋受  
玉冊領中書省樞密院至大二年立尚書省帝兼尚書  
令詹事院臣啟金州獻瑟瑟洞請遣使采之帝曰所寶  
惟賢瑟瑟何用焉若此者後勿復聞有近侍言賈人售  
美珠者帝曰吾服御不喜飾珠璣以生民膏血不可輕  
耗汝等當廣進賢才以恭險愛人相規不可以奢靡壺

財相導也四年春正月庚辰武宗崩帝入居內殿壬午  
即罷尚書省以丞相托克托三寶努平章約蘓右丞保  
巴左丞孟克特穆爾參政王巖變亂舊章流毒百姓命  
中書右丞相塔斯布哈知樞密院事特穆爾布哈等參  
鞠丙戌托克托三寶努約蘇保巴王巖伏誅杖孟克特  
穆爾流海南壬辰罷城中都召世祖朝諳知政務老臣  
平章程鵬飛董士選太子少傅李謙少保張律右丞陳  
天祥尚文劉正左丞郝天挺中丞董士珍太子賓客蕭

軒參政劉敏中王思廉韓從益侍御趙君信廉訪使程  
鉅夫杭州路達嚕噶齊阿哈瑪特給傳詣闕同議庶務  
乙未禁百官役軍人營造及守護私第丁酉以雲南行  
中書省左丞相特們德爾為中書右丞相太子詹事諤  
勒哲集賢大學士李孟並平章政事戊戌以塔斯布哈  
及徽政院使實沙並為御史大夫己亥改行尚書省為行  
中書省庚子停各處營造罷廣武康里衛追還印符驛券璽書及  
其萬戶等官宣敕辛丑以達實特穆爾知樞密院事壬

寅禁鷹坊馳驛擾民敕中書凡傳旨非親奉者勿行二月乙巳命和琳江浙行省依前設左丞相餘省惟置平章二員遙授職事勿與戊申罷運江南所印佛經辛亥禁諸王駙馬權豪擅據山場及宣政院違制度僧甲寅司徒蕭珍以城中都徵功毒民命追奪其符印令百司禁錮之還中都所占民田罷江南行通政院行宣政院甲子命中書平章李孟領國子監學諭之曰學校人材所自出卿等宜數詣國學課試諸生勉其德業敕諸王



駙馬食戶在縉山懷來等縣者與民均服徭役諸司擅  
奏除官者毋給宣敕御史臺臣言白雲宗總攝所統江  
南為僧之有髮者不養父母避役損民乞追收所受璽  
書銀印勒還民籍從之罷福建繡匠河南魚課兩提舉  
司省宣徽院參議斷事官丁卯命西蕃僧非奉璽書驛  
券及無西蕃宣慰司文牒者勿輒至京師仍戒黃河津  
吏驗問禁止罷總統所及各處僧錄僧正都綱司凡僧  
人訴訟悉歸有司罷仁虞院復置鷹坊總管府庚子

丁按

卯庚辰間不應有庚子日非庚午  
即丙子之訛無可據改姑仍其舊  
命廣西靜江融州軍

民官鎮守三載無虞者民官減一資軍官升一階著為  
令三月庚辰召前樞密副使吳元珪左丞貝降額卜德  
呼勒至京師同諸老臣議事丙戌罷五臺行工部己丑  
命母赦十惡大逆等罪庚寅即皇帝位於大明殿大赦  
辛卯禁民間製金箔銷金織金以御史中丞李士英為  
中書左丞丁酉命伊徹察喇依前太師宣徽使特爾格  
為太傅集賢大學士庫春為太保敕百司改升品級者

悉復至元舊制是月帝諭省臣曰卿等哀集中統至元以來條章擇曉法律老臣斟酌重輕折衷歸一頒行天下俾有司遵行則抵罪者庶無冤抑又諭太府監臣曰財用足則可以養萬民給軍旅自今雖一縑之微不言於朕毋輒與人以陝西行尚書省左丞額卜德呼勒為中書右丞昭文館大學士察罕參知政事中書平章政事知樞密院事綽和爾欽察親軍都指揮使托和齊巴圖爾中書右丞相知樞密院事特穆爾布哈錄軍國

重事知樞密院事伊蘇知樞密院事兼山東河北蒙古  
軍都萬戶額森特穆爾遂授左丞相仁虞院使額爾吉  
太子詹事伊嚕特穆爾並知樞密院事夏四月壬寅詔  
分汰宿衛士漢人高麗南人冒入者還其原籍丁未以  
太子少保張律為江浙平章戊申以即位告天地於南  
郊戊午告於太廟辛酉敕國子監師儒之職有才德者  
不拘品級雖布衣亦選用癸亥敕諸使臣非軍務急速  
者毋給金字圓牌定四宿衛士歲賜鈔二十四萬二百

五錠罷中都留守司復置隆興路總管府乙丑封知樞  
密院事特穆爾布哈為宣寧王丁卯罷至大錢鈔罷僧  
道伊嚕勒昆達實密頭陀白雲宗諸司改封親王德勒  
格爾布哈為湘寧王罷回回哈達司屬五月壬申以宦  
者塔舒爾為利用監卿癸酉八百媳婦蠻與大小徹里  
蠻寇邊命雲南王及右丞阿固岱以兵討之改封乳母  
夫壽國公楊德榮為雲國公丙子命翰林國史院纂修  
先帝實錄及累朝皇后功臣列傳俾百司悉上事蹟庚

辰敕中書省裁省冗司壬午拘諸王駙馬及有司驛券  
自今遣使悉從中書省給降是月禁民捕鴛鴦六月癸  
卯敕宣政院凡西蕃軍務必移文樞密院同議以聞吐  
蕃犯永福鎮敕宣政院與樞密院遣兵討之乙巳命侍  
臣咨訪內外才堪佐國者悉以名聞丙午以內侍楊光  
祖為祕書卿譚振宗為武備卿闕居仁為尚乘卿並授  
弘文館學士甲寅封伊蘇台為懷仁郡王丁巳敕翰林  
國史院春秋致祭太祖太宗睿宗御容歲以為常命和

琳行省右丞巴喇瑪索和爾經理青海屯田大同路宣  
寧縣民家牝牛產犢頗類麒麟車載以獻左右曰古所  
謂瑞物也帝曰五穀豐熟百姓安業乃為瑞也此何為  
哉己未封樞密使博囉為澤國公庚申敕自今諸司白  
事須殿中侍御史侍側癸亥復雲州銀場提舉司丙寅  
拘收泉府司原給諸商取墨書丁卯罷扎哈齊巴勒噶  
遜所造上供酒己巳衛王阿穆爾克入見帝諭省臣曰  
朕與阿穆爾克同父而異母朕不撫育彼將誰賴其賜

鈔二萬錠他勿援例帝覽貞觀政要諭翰林侍講額琳  
特穆爾曰此書有益於國家其譯以國語刊行俾蒙古  
色目人誦習之秋七月辛未朔拘還遼陽省官提調諸  
事圖符璽書驛券裁減虎賁司職員己亥詔諭省臣曰  
朕前戒近侍毋輒以文記傳旨中書自今敢有犯者不  
須奏聞直捕其人付刑部究治敕御史臺臣選更事老  
成者為監察御史閏月辛丑命國子祭酒劉賡詣曲阜  
以太牢祠孔子甲辰車駕將還大都太后以秋稼方盛



勿令鷹坊馳人衛士先往庶免害稼擾民敕禁止之戊申封李孟秦國公命額琳沁策喇實為司徒己酉吐蕃寇禮店文州命總帥額琳沁等討之辛亥以西僧藏布班巴爾為國師己未詔諭省臣曰國子學世祖皇帝深所注意如平章博果密等皆蒙古人而教以成才朕今親定國子生額為三百人仍增陪堂生二十人通一經者以次補伴讀著為定式敕軍官七十致仕始聽子弟承襲其有未老即託疾引年令幼弱子弟襲職者除名

不敘其巧計求遷者以違制論乙丑遣使招諭黑水白水等蠻十二萬餘戶來降丁卯諤勒哲李孟等言方今進用儒者而老成日以凋謝四方儒士成才者請擢任國學翰林祕書太常或儒學提舉等職俾學者有所激勸帝曰卿言是也自今勿限資級果才而賢雖白身亦用之禁醫人非選試及著籍者毋行醫藥八月己巳朔裁定京朝諸司員數並依至元三十年舊額以近侍吹喇實為戶部尚書九月己亥朔遙授左丞相布哈進太尉

丙午安南國王陳益稷入見言臣自世祖朝來歸妻子  
皆為國人所害朝廷因遙授湖廣平章仍與王爵賜漢  
陽田五百頃俾自贍以終餘年今臣年幾七十而有司  
拘臣所授田就食無所帝謂省臣曰安南國王慕義來  
歸宜厚其賜以懷遠人其進勲爵受田如故戊申禁民  
彈射飛鳥殺馬牛羊當乳者庚戌命樞密院大閱各省  
軍馬壬子詔改明年為皇慶元年都水監卿茂巴爾斯傳  
旨給驛往取杭州所造龍舟省臣諫曰陛下踐阼誕告

天下凡非宣索毋得擅進誠取此舟有乖前詔詔止之  
復置中宮位下齊哩克昆諸色民匠打捕鷹坊都總管  
府丙寅敕省部官勿托以宿衛廢職罷西番茶提舉司  
冬十月戊辰朔有事於太廟丁丑禁諸僧寺毋得侵冒  
民田辛巳罷宣政院理問僧人詞訟特授故太師阿爾  
婁子穆哩庫榮祿大夫知樞密院事辛卯罷諸王斷事  
官其蒙古人犯盜詐者命所隸千戶鞠問癸巳置汴梁  
平江等處田賦提舉司掌大承華普慶寺賢產十一月

戊戌封司徒穆蘇為趙國公辛丑立乖西府以土官阿  
馬知府事佩金符李孟奏錢糧為國之本世祖朝量入  
為出恒務撙節故倉庫充牣今每歲支鈔六百餘萬錠  
又土木營繕百餘處計用數百萬錠內降旨賞賜復用  
三百餘萬錠北邊軍需又六七百萬錠今帑藏見貯止十一  
萬餘錠若此安能周給自今不急浮費宜悉停罷帝納其言  
凡營繕悉罷之辛亥諸王布林尼敦等誣班布爾實以不法詔  
竄布林尼敦圖罕於河南伊克爾爾於揚州納琳於湖廣台納

於江西已勒楚納克於雲南己未以遼陽省平章政事哈薩  
為中書平章政事丙寅加徽政使羅源為大司徒十二月癸  
酉封宣政會福院使溫普為秦國公甲申以浙西水災免漕  
江浙糧四分之一存留賑濟命江西湖廣補運輸京師庚寅  
申禁漢人持弓矢兵器田獵曲赦大都死罪囚一人并  
流以下罪辛卯遣官監視焚至大鈔乙未命李孟整飭  
國子監學中書省臣言世祖定立選法升降以示激勸  
今官未及考或無故更代或躡等進階僭受國公丞相

等職諸司已裁而復置者有之今春以內降旨除官千餘人其中欺偽豈能悉知壞亂選法莫此為甚帝曰凡內降旨一切勿行遣禮部尚書奈瑪台等齎詔往諭安南並頒皇慶元年曆日

皇慶元年春正月庚子帝諭御史大夫塔斯布哈曰凡大臣不法卿等劾奏毋避朕自裁之癸卯敕諸僧犯姦盜詐偽鬪訟仍令有司專治之甲辰授太師錄軍國重事知樞密院事多爾濟戩開府儀同三司嗣淇陽王庚

戊封知樞密院事綽哈為安遠王出總北軍戊午改封  
濟王圖烈納為吳王加崇福使阿哩雅秦國公二月丁  
卯朔徙大都路所置周宣王石鼓於國子監甲戌制定  
封贈名爵等級壬午封博囉為永豐郡王置德安府行  
用鈔庫罷莊浪州唐古千戶所庚寅敕嶺北賑關食流  
民賑山東流民至河南境者三月丁酉朔罷諸王大臣  
私第營繕庚子加御史大夫和尼齊開府儀同三司戊  
申以前河南行省平章政事塔斯哈雅為御史大夫置



五臺寺濟民局丙辰封同知徽政院事常布呼齊為趙  
國公乙丑封諸王塔斯布哈為恩平王夏四月丁卯簡  
控鶴士還本籍置察罕淖爾捕盜司癸酉車駕如上都  
壬午敕僧人田除宋之舊有并世祖所賜外餘悉輸租  
如制封知樞密院事穆哩庫為廣平王庚寅大崇恩福  
元寺成五月丙申朔以中書平章政事哈克繖為中書

左丞相江浙行省平章張律為中書平章政事

穆罕相表哈克

繖為左丞相在九月張律為平章政事在三年正月皆與紀異知樞密院事額森特穆

爾授開府儀同三司壬寅禁諸王農時出獵丁未縉山  
縣行宮建涼殿六月乙丑朔日有食之己巳敕李孟博  
選中外才學之士任職翰林丁亥敕罷封贈誠左右守  
法度勤職業勿妄僥倖加官秋八月己卯以吏部尚書  
許師敬為中書參知政事庚辰帝還大都辛卯敕雲南  
省右丞阿固岱等領蒙古軍從雲南王討八百媳婦蠻  
安南國王陳益稷來朝九月丁酉增江浙海漕糧二十  
萬石戊戌罷征八百媳婦蠻大小徹里蠻以璽書招諭

之甲辰以參議中書省事鄂博哈雅為叅知政事冬十月甲子有事於太廟雲南行省右丞索勒濟爾威有罪國師楚斯節巴咱爾奏請釋之帝斥之曰僧人宜誦佛書官事豈當與耶癸未以中書叅知政事察罕為中書平章政事商議中書省事辛卯大赦賜李孟潞州田二十頃十一月丙午諭六部官毋踰越中書奏事丙辰封駙馬托克托穆爾為岐王

按諸王表托克托穆爾以延祐四年由濮陽王進封與紀

異  
庚申緬國主遣其婿及雲南不農蠻酋長岑福來朝

十二月癸亥中書平章政事李孟致仕以樞密副使張珪為中書平章政事癸酉遣使分道決囚庚辰知樞密院事達實密罷甲申鷹坊布哈濟勒請往河南湖廣括取孔雀珍禽敕以擾民不允丁亥遣官祈雪於社稷嶽鎮海瀆省臣言中書職在總挈綱維比者行省六部諸司應決不決者往往作疑咨呈以致文繁事弊詔體世祖立中書初意定擬程式以聞俾遵行之己丑宗王女巴勒丹給驛取江南田租命拘還驛券是月諸王吹丹

叛

二年春正月甲午以察罕淖爾等處宣慰使布呼為御  
史大夫辛丑封前尚書右丞相竒塔特布濟克為安吉  
王丙午寧王庫庫楚薨丁未以太府卿圖古勒為中書  
右丞相己未置遼陽行省儒學提舉司二月己卯免徵  
益都饑民所貸官糧二十萬石各寺修佛事日用羊九  
千九百四十數遵舊制易以蔬食辛巳詔以錢糧造作  
訴訟等事悉歸有司以清中書之務丁亥功德使以

佛事奏釋重囚不允帝諭左右曰回回以寶玉鬻於官  
朕思此物何足為寶唯善人乃可為寶善人用則百姓  
安茲國家所宜寶也三月丙申以御史中丞托歡達爾  
罕為御史大夫丙午冊立皇后鴻吉哩氏壬子御史中  
丞郝天挺上疏論時政帝喜納之丙辰以亢旱既久帝  
於宮中焚香默禱遣官分禱諸祠夏四月乙亥車駕如  
上都丙子高麗王辭位以其世子王燾為征東行中書  
省左丞相上柱國封高麗國王辛巳加御史大夫布呼

開府儀同三司太傅乙酉御史臺臣言富人夤緣特旨  
濫受官爵徼政宣徼用人率多罪廢之流近侍託為貧  
乏互奏恩賞西僧以作佛事之故累釋重囚外任之官  
身犯刑憲輒營求內旨以免罪諸王駙馬寺觀臣僚土  
田每歲徵租亦極為擾民請悉革其弊從之五月辛丑  
以中書右丞額卜德呼勒為平章政事左丞巴勒音為  
右丞參知政事鄂博哈雅為左丞參議中書省事圖爾  
哈特穆爾為參知政事六月癸亥圖古勒等以災異乞

賜放黜不允辛未以參知政事許師敬綱領國子學乙亥詔僧俗爭訟有司及主僧同問續置土田如例輸稅壬午命監察御史檢察監學官考其殿最甲申建崇文閣於國子監以宋儒周敦頤程顥程頤張載邵雍司馬光朱熹張栻呂祖謙及故中書左丞許衡從祀孔子廟庭秋七月癸巳以作佛事釋囚徒二十九人辛丑復立四川等處儒學提舉司八月丁卯帝還大都庚午以侍御史薛居敬為中書參知政事九月以薩斯嘉巴為帝



師癸巳以宣徽院使諤勒哲知樞密院事戊申封托歡  
為安定王敕鎮江路建銀山寺勿徒寺傍瑩家京師大  
旱帝問弭災之道翰林學士程鉅夫舉湯禱桑林事帝  
獎諭之冬十月己卯敕中書省議行科舉封博迪穆爾  
為安德王十一月甲辰行科舉詔天下以皇慶三年八  
月天下郡縣興其賢者能者充貢有司次年二月會試  
京師中選者親試於廷賜及第出身有差帝謂侍臣曰  
朕所願者安百姓以圖至治然匪用儒士何以致此設

科取士庶幾得真儒之用而治道可興也十二月辛酉  
克里瑪鼎上所編萬年厯海都都勒幹屬戶內附敕所  
在給衣糧丙子定百官致仕資格

延祐元年春正月丁亥授中書右丞劉正平章政事商  
議中書省事庚子敕各省平章為首者及漢人省臣一  
員專意訪求遺逸苟得其人先以名聞而後致之以江  
浙行中書省左丞高昉為中書參知政事丁未改元釋  
天下流以下罪囚免上都大都差稅二年其餘被災曾

經賑濟人戶免差稅一年庚戌中書省臣圖嚕庫以災  
變乞罷不允二月庚申立印經提舉司甲戌以侍御史  
趙世延為中書參知政事免蒙古地差稅二年高賈勿

免壬午圖嚕庫罷以哈克織為中書右丞相

按續綱目  
圖嚕庫罷

以哈克織為右丞相宰相表圖嚕庫亦於是年二月罷  
本紀原文上書圖嚕庫乞罷不允此載以哈克織為中  
書右丞相而無圖嚕庫罷四字于  
宰臣更代名法殊為疎畧今增 監修國史癸未以中

書參政高昉為集賢學士三月乙巳以作佛事擇釋獄  
囚命中書審察丙午封阿嚕圖為趙王戊申車駕如上都

己酉敕姦民宮其子為閹宦謀避徭役者罪之辛亥命

參知政事趙世延綱領國子學癸丑中書平章政事察

罕致仕

按察罕本傳致仕在  
皇慶元年與紀異

晉寧民侯喜兒昆弟五人

並坐法當死帝歎曰彼一家不幸而有是事其擇情輕

者一人杖之俾養父母母絕其祀閏月甲寅朔敕減樞

密知院各冗員辛酉罷呪僧月給俸遣人視大都至上

都駐蹕之地有侵民田者計畝給直夏四月丁亥太常

寺臣請立北郊不允壬辰諸王托克托薨以諤斯伯襲

位已酉敕郡縣官勤職者加賜幣帛以持們德爾錄軍  
國重事監修國史立回回國子監帝以資治通鑑載前  
代興亡治亂命集賢學士和塔拉都哩默色及李孟擇  
其切要者譯寫以進五月丁卯賜李孟孝感縣地二十  
八頃禁諸王支屬徑取分地租賦擾民敕嶺北行省瘞  
陣沒遺骼戊寅京兆為故儒臣許衡立魯齋書院降璽  
書旌之六月戊子敕內侍今後止授中官勿畀文階置  
雲南行省儒學提舉司封河南省丞相布琳濟達為河

南壬辰發軍增墾河南芍陂等處屯田秋七月庚午  
命 中書省臣議復封贈弛下番市舶之禁八月戊子車  
駕至大都九月己巳復以特們德爾為右丞相哈克繖  
為左丞相罷陝西諸道行御史臺冬十月乙未敕吏人  
轉官止從七品在選者降等注授敕下番商販須江浙  
省給牒以往歸則征税如制私往者沒其物遣官括淮  
民所佃閒田不輸稅者丙申復甘肅屯田置沙瓜等處  
屯儲總管萬戶府庚戌監察御史言乞命樞密院設法

教練士卒應軍官襲職者試以武事而後任之從之遣  
張律經理江南田糧十一月戊辰以通政院使蕭拜珠  
為中書右丞辛未以翰林學士承旨達實密知樞密院  
事癸酉敕吏人賊行者黥其面戊寅以前中書右丞相  
圖魯庫知樞密院事十二月辛卯禁諸王駙馬權勢之  
人增價鬻鹽壬辰詔定官員士庶衣服車輿制度己亥  
敕中書省定議孔子五十三代孫當襲封衍聖公者以  
名聞庚子遣官浚揚州淮安等處運河以翰林學士承

旨李孟復為中書平章政事乙巳敕經界諸衛屯田

二年春正月己巳置大聖壽萬安寺都總管府庚午立

行用庫於江陰州乙亥遣宣撫使分十二道問民疾苦

黜陟官吏並給銀印命中書省臣分領庶務二月己卯

朔會試進士庚子以恭嚙諾爾布喇實宜勒燦巴勒藏

布為帝師賜玉印壬寅雲南王羅丹來朝辰沅洞蠻吳

干道為寇救調兵捕之三月乙卯廷試進士賜呼圖克

岱爾張起巖等五十六人及第出身有差

按是為左右榜之始元自



世祖時議定科舉新制未及行至是始以蒙古色目人為右榜漢人南人為左榜每三歲一試其授官兩榜皆同茲四十餘年之創舉也 庚午以加上皇太后尊號蠲天下逋欠稅

課丁丑以中書平章張律為江浙行省平章政事夏四月戊寅朔日有食之辛巳賜進士恩榮宴於翰林院辛丑賜會試下第舉人七十以上從七品流官致仕六十以上府州教授餘並授山長學正後勿援例敕諸王分地仍以流官為達嚕噶齊各位所辟為副達嚕噶齊命李孟等類集累朝條格俟成書聞奏頒行乙巳車駕如上

都加授特進上卿玄教大宗師張留孫開府儀同三司  
丙午封諸王徹伯爾為汝寧王五月戊申朔復立陝西  
諸道行御史臺庚午立海西遼東鷹坊萬戶府隸中政  
院壬申諸王寶都寶喇薨甲戌加授宦者中尚卿續元  
暉昭文館大學士六月辛丑以濟寧益都亢旱汰省宿  
衛士烏粟秋七月甲寅改扎哈齊巴勒噶遜總管府為  
尚供府乙卯贛州土賊蔡五九聚眾作亂敕遣兵捕之  
敕阿蘇衛戶貧乏者給牛種耕具於拉薩哩地屯田癸

百命特們德爾總宣政院事八月丙戌蔡五九臨汀州  
寧化縣遣江浙行省平章張律等討之己丑車駕至自  
上都乙未臺臣言蔡五九之變皆由彙智密鼎經理田

糧與郡縣橫加酷暴逼抑至此信豐一縣

信豐元史作  
新豐按蔡五

九之變起自贛州應指江西  
之信豐為是今據地理志改

撤民廬千九百區虛張頃

畝流毒居民乞罷經理及冒括田租從之壬寅增國子

生百員歲貢伴讀四員詔江浙行省印農桑輯要萬部

頒降有司遵守勸課九月丁未張律以括田逼死九人

敕吏部尚書王居仁等鞠之壬戌蔡五九衆潰伏誅餘  
黨悉平賞軍士討捕功并官其死事者子孫冬十月丁  
丑封托和齊為威寧郡王浩爾齊特穆爾布哈為趙國  
公庚辰以淮西庶訪使郭貫為中書參知政事壬午有  
事於太廟乙未以同知樞密院事特穆爾圖知樞密院  
事授白雲宗主沈明仁榮祿大夫司空丁酉加授特們  
德爾太師十一月甲戌封和實拉為周王出鎮雲南十  
二月庚寅增置平江路行用庫癸巳命省臣定擬封贈

通例俾高下適宜以聞旌表汀州寧化縣民賴祿孫孝  
行

三年春正月乙巳特授實保齊巴勒噶遜達嚕噶齊托  
歡金紫光祿大夫太尉丙午封前中書左丞相和爾岱  
爾壽國公以真定保定荐饑禁畝獵辛酉以同知樞密  
院事瑪魯知院事二月丁丑調海口屯儲漢軍千人隸  
臨清運糧萬戶府以供轉漕三月辛亥特授高麗王世  
子王暉開府儀同三司瀋王加授將作院使呂天麟大

司徒甲寅敕蕭拜珠及陝西四川省臣各一員護送周王之雲南置周王常侍府癸亥車駕如上都壬申禁天下春時畋獵夏四月癸酉朔河南流民羣聚渡江所過擾害命行臺庶訪司以見貯贓鈔賑之壬午敕衛輝昌平守臣修殷比干唐狄仁傑祠歲時致祭庚子以上都留守哈喇格爾知樞密院事五月辛亥以江西行省右丞相庫春為大司徒庚申以大都留守拜特穆爾為中書平章政事以中書右丞蕭拜珠為平章政事左丞鄂

博哈雅為右丞參政郭貫為左丞參議布哈為參知政  
事庚午置甘肅儒學提舉司遼陽金銀鐵冶提舉司六  
月乙亥改諸王功臣分地丙子融賓柳州徭蠻叛命湖  
廣行省遣官督兵捕之丁丑敕大辟罪臨刑敢有橫加  
剗割者以重罪論凡鞠囚非強盜毋加酷刑己卯詔諭  
百司各勤其職毋隳廢大政丁亥封綽和爾為甸容郡  
王秋七月壬子命御史大夫布呼托歡達爾罕拯治臺  
網仍降詔宣諭中外乙卯封伊嚕特穆爾為保恩王賜

金印

按諸王表伊噶特穆爾封保恩王在二年與紀異

丙寅復以雅克特穆爾知

樞密院事八月癸酉以兵部尚書竒塔特為中書參知

政事己卯車駕至大都戊戌置織佛像工匠提調所九

月辛丑復五條河屯田以中書左丞郭貫為集賢大學

士集賢大學士王毅為中書左丞冬十月壬申有事於

太廟調四川軍二千人雲南軍三千人子烏蒙等處屯

田庚寅敕五臺靈鷲寺置鐵冶提舉司丁酉申禁民有

父在者不得私貸人錢及甯墓木十一月壬寅命監察



御史監治嶺北鈎授錢糧半歲更代乙卯改舊運糧提  
舉司為大都陸運提舉司新運糧提舉司為京畿運糧  
提舉司澧州路安撫司為安定軍民府十二月庚午以  
知樞密院事圖鳴庫為陝西行省左丞相壬午授嗣漢  
天師張嗣成太玄輔化體仁應道大真人掌江南道教  
事丁亥立子碩迪巴拉為皇太子兼中書令樞密使授  
以金寶告天地宗廟以同知樞密院事綽和爾知樞密  
院事

四年春正月庚子帝謂左右曰中書比奏百姓乏食宜  
加賑恤朕思民饑若此豈政有過差以致然歟向詔百  
司務遵世祖成憲宜勉力奉行輔朕不逮乙卯諸王托  
克托駐雲南擾害軍民以昂輝代之丙辰以知樞密院  
事鄂勒哲為雲南行省平章政事閏月庚辰封諸王博  
囉為冀王丙戌以立皇太子詔天下給賜鰥寡孤獨鈔  
減各路租稅辛卯封拜特穆爾為汾陽王二月甲辰敕  
郡縣各社復置義倉戊申特授近侍諤勒哲布哈翰林

侍讀學士知制誥同修國史三月辛卯車駕如上都夏四月壬寅加授太常禮儀院使拜珠大司徒戊申達哈蘇寇邊吳王圖列納等敗之于和懷己未諸王耨埒費乙丑禁嶺北酒帝嘗夜坐謂侍臣曰雨暘不時奈何蕭拜珠對曰宰相之過也帝曰卿不在中書耶拜珠惶愧帝露香默禱既而大雨左右以雨衣進帝曰朕為民祈雨何避焉翰林學士承旨和塔拉都哩然色劉賡等譯大學衍義以進帝覽之謂羣臣曰大學衍義議論甚嘉

其令翰林學士阿拉克特穆爾譯以國語五月辛未授  
上都留守庫庫楚開府儀同三司大司徒乙亥加封大  
長公主孟古岱為皇姑大長公主壬午黃州高郵真州  
建寧等處流民羣聚持兵抄掠敕所在有司其傷人及  
盜者罪之餘並給糧遣歸以翰林學士承旨齊勤特穆  
爾為中書平章政事中書平章額卜德呼勒為集賢大  
學士己丑以中書左丞鄂博哈雅為平章政事參政奇  
塔特為右丞高昉為左丞參議中書省事和卓張思明

並參知政事六月戊申特們德爾罷以左丞相哈克繖  
為中書右丞相已酉額卜德呼勒復為中書平章政事  
壬子以工部尚書王桂為中書參知政事丙辰敕諸王  
駙馬功臣分地仍舊制自辟達嚕噶齊秋七月乙亥李  
孟罷以江浙行省左丞王毅為中書平章政事壬午特  
授中衛親軍都指揮使布呼齊太尉辛卯帝諭省臣曰  
比聞蒙古諸部困乏往往鬻子女于民家為婢僕其命  
有司贖之還各部帝出見衛士有敝衣者駐馬問之對

曰戍守邊鎮踰十五年以故貧耳帝曰此輩久勞于外  
留守臣未嘗以聞非朕親見何由知之自今有類此者  
必言於朕因賜之錢帛八月丙申車駕至自上都庚申  
哈克繖奏軍畢帝問曰卿等日所行者何事哈克繖對  
曰臣等第奉行詔旨而已帝曰卿等何嘗奉行朕旨雖  
祖宗遺訓朝廷法令皆不遵守夫法者所以辨上下定  
民志自古及今未有法不立而天下治者使人君制法  
宰相能守而勿失則下民知所畏避綱紀可正風俗可

厚其或法弛民慢怨言並興欲求治安豈不難哉九月  
丙寅哈克繖言故事丞相必用蒙古勳臣哈克繖回回  
人不厭人望遂懇辭制以宣徽使博迪蘇為中書右丞  
相哈克繖為左丞相冬十月甲午朔有事于太廟壬寅  
遣御史大夫布呼參知政事王桂祭陝西嶽鎮名山已  
酉監察御史言官吏丁憂起復人情驚惑請禁止以絕  
僥倖惟朝廷耆舊特旨起復者不在禁例從之戊午海  
外婆羅公民船漂至温州敕江浙省資遣還鄉十一月

己卯復浚揚州運河壬辰諭諸宿衛入直各居其次非  
有旨不得上殿闌入禁中者坐罪十二月丁酉復廣州  
採金銀珠子都提舉司乙巳遣官即興和路及淨州發  
廩賑給北方流民丁巳以內宰領延福司事圖們岱爾  
知樞密院事特授晉王內史阿勒坦綽克金紫光祿大  
夫魯國公辛酉改齊哩克昆民匠總管府為繕用司  
五年春正月乙酉敕諸王位下民在大都者與民均役  
丁亥湖廣平章邁珠加魯國公大司農二月癸巳朔日



有食之丁酉封諸王鴻和特穆爾為嘉王圖們特穆爾

為武平王並賜印戊申建盦頂殿於文德殿後

按殿耕錄載光天殿

西北有盦頂殿五間後又有盦頂小殿與文德殿同在明暉門外此外又有盦頂并亭盦頂房盦頂之制三楹其頂若筍之平故名考字書盦與麓通蓋巨積之小者命名之義取此舊文誤鹿今據改辛亥敕杭

州守臣春秋祭淮安忠武王巴延祠乙卯敕上都諸寺

權豪高販貨物並輸稅課戊午以扎蘭齊喇萬戶府為

右衛率府給書西天字維摩經金三千兩庚申罷封贈

三月庚午立諸王鄂羅木烏遜部打捕鷹坊諸色人匠

齊哩克昆總管府乙亥特授安遠王綽哈開府儀同三  
司錄軍國重事知樞密院事癸未給金九百兩銀百五  
十兩書金字藏經夏四月壬辰安吉王竒塔特布濟克  
薨庚戌升印經提舉司為延福監遣官分汰各部流民  
給糧賑濟免懷孟河南南陽居民所輸陝西鹽課摩琳  
特爾格驛困乏濟以馬五千匹遼陽饑轉海漕糧十萬  
石於義錦州以賑貧民甲寅樞密院臣言各省調度軍  
馬惟長官二人領其事今四川省諸臣皆預非便請如

舊制從之以齊諾史弼並為中書平章政事侍御史敬儼為中書參知政事戊午車駕如上都五月辛酉朔順元等處軍民宣撫使阿晝以洞蠻酋黑沖子子昌奉方物來覲丁卯以御史中丞伊拉齊為中書右丞相壬申監察御史言比年名爵冒濫太尉司徒國公接跡于朝昔奉詔裁罷中外莫不欣悅近聞禮部奉旨鑄太尉司徒司空等印二十有六此輩無功於國載在史冊貽笑將來請自今門閥貴重勲業昭著者存留一二餘並革

去從之癸酉遣官分道裁決笞以下罪六月辛卯御史  
臺臣言昔遣張律等經理江浙江西河南田糧虛增糧  
數流毒生民已嘗奉旨俟三年徵租今及其期若江浙江  
西當如例輸之其河南請視向例減半徵之從之癸巳  
以典瑞院使庫春為集賢大學士領典瑞院事大司徒  
乙巳術者趙子玉等七人伏誅秋七月己未朔李邦寧  
加開府儀同三司壬申御史中丞趙簡言皇太子春秋  
鼎盛宜選耆儒敷陳道義今李銓侍東宮說書未諳經

史請別求碩學分進講讀實宗社無疆之福從之八月  
庚子車駕至大都九月癸亥大司農邁珠等進司農丞  
苗好謙所撰栽桑圖說帝曰農桑衣食之本此圖甚善  
命刊印散之民間丙寅廣西兩江龍州萬戶趙清臣太  
平路總管李興隆率土官黃法扶何凱並以方物來貢  
賜幣帛有差丁卯以中書右丞宣徽使伊拉齊為中書  
平章政事左丞高昉為右丞參知政事和卓為  
左丞吏部尚書音扎噶為參知政事己卯以江浙

省所印大學行義五十部賜朝臣辛巳置大永福寺都  
總管府壬午敕軍官犯罪行省咨樞密院議擬毋擅決  
遣丙戌以簽太常禮儀院事果勒為中書參知政事冬  
十月辛卯禁大同蕪寧晉寧等路釀酒壬辰建帝師帕  
克斯巴殿於大興教寺給鈔萬錠甲午有事於太廟癸  
丑贛州路零都縣里胥劉景周以有司徵括田新租聚  
衆作亂赦免徵新租招諭之十一月辛酉開成莊浪等  
處禁酒壬戌改黃花嶺屯儲軍民總管府為屯儲總管

府山後民饑增海漕四十萬石丁卯追奪建康富民王  
訓等白身濫受宣敕仍禁冒籍貫宿衛及考授遠方職  
官不赴任求別調者隱匿不自首者罪之己巳以同知  
樞密院事忠嘉知樞密院事丙子集賢大學士太保庫  
春言唐陸淳著春秋纂例辨疑微旨三書有益後學請  
令江西行省鈇梓以廣其傳從之癸未敕江西茶運司  
歲課以二十五萬錠為額敕大永福寺創殿安奉順宗  
皇帝御容十二月壬辰特授集賢大學士圖烈大司徒

辛亥置重慶路江津巴縣等處屯田省成都歲漕萬二千石

六年春正月丁卯敕福建兩廣雲南甘肅四川軍官致仕還家官給驛傳如民官例癸酉特授同知徽政院事趙爾達爾罕金紫光祿大夫太尉己卯廣東南恩新川猛賊龍郎庚等為寇命江西行省發兵捕之帝御嘉禧殿謂扎爾古齊瑪魯曰扎爾古齊人命所繫其詳閱獄解事無大小必謀諸同僚疑不能決者與省臺臣集議



以聞二月丁亥朔日有食之改釋奠於中丁祀社稷於中戊崇星於回回司天臺丁酉雲南闡里愛俄永昌蒲蠻阿八刺等並為寇命雲南省從宜勦捕乙巳敕諸司不由中書奏官輒署事者悉罷之特授僧從吉祥榮祿大夫大司空加榮祿大夫大司徒僧文吉祥開府儀同三司三月丁巳以天壽節釋重囚一人辛酉以御史中丞托克托呼為御史大夫諭之曰御史大夫職任至重以卿勲舊之裔故特授汝當思乃祖乃父忠勤王室仍以

古名臣為法否則將陞汝家聲負朕委任之意矣丙寅  
特授翰林學士承旨巴爾斯布哈開府儀同三司大司  
徒己巳敕諸王耐馬宗姻諸事依舊制領於內八府官  
勿徑移文中書封諸王伊嚕特穆爾為恩王夏四月壬  
辰中書省臣言雲南土官病故子姪兄弟襲之無則妻  
承夫職遠方蠻夷頑獷難制必任土人可以集事今或  
闕員宜從本俗權職以行從之丙申命京師諸司官吏運  
糧輸上都興和賑濟蒙古饑民庚子車駕如上都以特

們德爾為太子太師內外監察御史四十餘人劾其逞私蠹政難居師保之任不聽諸王格藏薨五月丙子加安南國王陳益稷儀同三司六月癸巳以米五千石賑大長公主所隸貧民丁丑以濟寧等路水遣官閱視其民乏食者賑之仍禁酒開河泊禁秋七月丙辰來安路總管岑世興叛據唐興州賜璽書招諭之甲戌皇姊大長公主僧格喇實作佛事釋全寧府重囚二十七人敕按問全寧守臣阿從不法仍追所釋囚還獄八月甲申以

河東山西道宣慰使張思明為中書參知政事甲午以授皇太子玉冊告祭於南郊庚子車駕還大都丁未告祭於太廟閏月甲子浚會通河壬申以太傅御史大夫布呼為太師癸酉敕諸司有受命不之官及避繁劇托故去職者奪其宣敕九月甲申以徽政使托廸為太傅參議中書省事竒徹為參知政事癸巳以作佛事釋大辟囚七人流以下囚六人戊戌增海漕十萬石癸卯御史臺臣言比者官以倖求罪以賂免乞凡內外官非勲舊

有資望者不許驟升諸犯贓罪已欵伏及當鞠而幸免者悉付原問官以竟其罪其貪污受刑奪職不叙者夤緣近侍出入內度覬倖名爵宜斥逐之帝皆納其言浚鎮江練湖冬十月乙卯中書省臣言白雲宗總攝沈明仁強奪民田二萬頃誑誘愚俗十萬人私賂近侍妄受名爵已奉旨追奪請汰其徒還所奪民田其諸不法事宜令覈問有旨朕知沈明仁姦惡其嚴鞠之辛酉以扎爾古齊特穆爾布哈為御史大夫丙子以皇太子受玉

冊詔天下已卯浚通惠河十一月辛卯木邦路帶邦為

寇敕雲南省招捕之乙巳

按辛卯庚子間不應有乙巳日非癸巳即乙未之訛無可

據改姑仍其舊

以秘書卿沙木斯鼎為大司徒庚子敕晉王部

貧民二千居青海屯田帝諭臺臣曰有國家者以民為

本比聞百姓疾苦銜冤者衆其令監察御史廉訪司審

察以聞十二月壬戌命皇太子參決國政封宋儒周惇

頤為道國公己巳復吏人出身舊制其犯贓者止從七

品壬申平章政事王毅以親老辭職從之仍賜其父幣

帛癸酉是夜風雪甚寒帝謂侍臣曰朕與卿等居暖室宗戚昆弟遠戍邊陲曷勝其苦歲賜幣帛可不遍及耶敕上都大都冬夏設食於路以食饑者

七年春正月辛巳朔日有食之帝齋居損膳輟朝賀辛卯江浙行省丞相赫嚕言白雲僧沈明仁擅度僧四千八百餘人獲鈔四萬餘錠既已辭伏今遣其徒沈崇勝潛赴京師行賄求援請逮赴江浙併治其罪從之丁酉帝不豫辛丑崩於光天宮年三十六諡曰聖文欽孝皇

帝廟號仁宗國語曰布延圖皇帝

仁宗皇慶二年延祐七年凡九年





欽定續通志卷六十四

欽定四庫全書

史部

欽定續通志卷六十七

五至

主事臣尹壯圖覆勘

總校官原任侍講臣王燕緒

欽定四庫全書

欽定續通志卷六十五

元紀

英宗

英宗皇帝諱碩迪巴拉仁宗嫡子也母莊懿慈聖皇后  
鳩吉哩氏初武宗即位立仁宗為太子約以次傳已子  
和實拉既而仁宗即位議立太子丞相特們德爾請立  
帝帝入謁太后固辭曰臣幼無能且有兄和實拉在宜

立太后不許遂立為皇太子詔百司庶務先啟太子然後奏聞帝謂中書省臣曰至尊委我以天下事日夜寅畏惟恐弗堪卿等亦當洗心滌慮恪勤乃職勿有隳壞

以貽君父憂延祐七年春正月戊戌

仁宗紀  
作丁酉

仁宗不豫

帝憂形於色夜則焚香泣曰至尊以仁慈御天下庶績順成四海清晏今天降大厲不如罰殛我身使至尊永為民主辛丑仁宗崩帝哀毀過禮素服寢於地日歎一粥甲辰太子太師特們德爾以太后命為右丞相丙午

遣使分諭內外刑獄戊申禁巫祝日者交通宗戚大臣  
二月壬子罷造永福寺以江浙行省左丞相赫魯為中  
書平章政事辛酉平章政事齊勤特穆爾御史大夫托  
歡罷為集賢大學士甲子特們德爾阿薩爾請捕逮四  
川行省平章政事趙世延赴京參議中書省事清沙津  
坐鬻官刑部以法當杖太后命笞之帝曰不可法者天  
下之公徇私而輕重之非示天下以公也卒正其罪丙  
寅以陝西行省平章政事趙世榮為中書平章政事江

西行省右丞茂巴爾為中書右丞參知政事張思明為  
中書左丞中書左丞和卓罷為嶺北行省右丞丁郊白  
雲宗總攝沈明仁以不法坐罪詔籍江南冒稱白雲僧  
者為民癸酉括勘崇祥院地冒以官地獻者追其直以  
民地獻者歸其主丙子定京城環衛更番法準五衛漢  
軍歲例丁丑奪前中書平章政事李孟所受秦國公制  
命仍仆其先墓碑戊寅中書平章政事額卜德呼勒罷  
為甘肅行省平章政事阿爾哈雅罷為湖廣行省平章

政事特們德爾以前御史中丞楊多爾濟中書平章政事蕭拜珠違太后旨矯命殺之並籍其家徽政院使實勒們以太后命請更朝官帝曰此豈除官時耶且先帝舊臣豈宜輕動俟予即位議於宗親元老賢者任之邪者黜之可也司農卿鄂勒哲布哈言先帝以土田頒賜諸臣者宜悉歸之官帝問賜者為誰對曰左丞相阿薩爾所得為多帝曰予常諭卿等當以公心輔弼卿於先朝嘗請海舶之稅以阿薩爾奏而止今卿所言乃復私

憾耳非公議也豈輔弼之道耶遂出之為湖南宣慰使  
奪僧年扎克策喇實等所受司徒國公制仍銷其印三  
月戊子徵諸王駙馬流竄者給侍從遣就分邑庚寅帝  
即位於大明殿大赦尊太后為太皇太后壬辰太皇太  
后受百官朝賀於興聖宮特們德爾進開府儀同三司  
上柱國太師敕羣臣超授散官者朝會毋越班次壬寅  
降前中書平章政事李孟為集賢侍講學士悉奪前所  
受制命御史臺臣請降詔諭百司以肅臺綱帝曰卿等



但守職盡言善則朕當服行否亦不汝罪也丙午有事於南郊告即位夏四月乙卯申詔京師勢家與民均役己未紹慶路洞蠻為寇命四川行省捕之祭遁甲神於香山命平章政事王毅等徵理在京諸倉庫糧帛虧額申嚴和琳酒禁庚申降百官越階者並依所受之職以太常禮儀院使拜珠為中書平章政事以西僧雅布達勒為元永延教三藏法師壬戌特們德爾請參決政務禁諸臣毋隔越擅奏從之乙丑仁宗喪卒哭作佛事七

日戊辰車駕如上都議祔仁宗以陰陽拘忌權結綵殿於太室東南以奉神主戊寅有獻七寶帶者因近臣以進帝曰朕登大位不聞卿等薦賢而為人進帶是以利誘朕也其還之五月庚辰上都留守賀巴延坐便服迎詔棄市籍其家己丑中書省臣請禁擅奏除拜帝曰然恐朕遺忘或乘間奏請濫賜名爵汝等當復以聞復置青海五條河屯田左丞相阿薩爾罷為嶺北行省平章政事以拜珠為中書左丞相龜喇呼塔斯哈雅並為中

書平章政事濟爾噶朗為中書參知政事辛卯參知政事竒徹罷為集賢學士壬辰和琳民閭海瘞殍死者三千餘人旌其門戊戌有告嶺北行省平章政事阿薩爾中書平章政事赫魯及御史大夫圖塔哈徽政使寶勒們等與故約蘇穆爾妻伊埒薩巴謀廢立拜珠請鞫狀帝曰彼若借太皇太后為詞奈何命悉誅之籍其家追封隴西公汪世顯為隴右王辛丑以知樞密院事特穆爾圖為中書平章政事壬寅監察御史請罷僧道工伶

濫爵及建寺豢獸之費丁未以賀巴延實勒們阿薩  
爾家貲田宅賜特們德爾等六月丁巳以江西行省左  
丞相托克托為御史大夫宗正扎爾古齊特穆爾布哈  
知樞密院事戊午罷廣東採珠提舉司以有司領其事  
封知樞密院事達實特穆爾為薊國公庚申賜角觝百  
二十人鈔各千貫辛酉詔免僧人雜役壬戌赦諸使至  
京者大事五日小事三日遣還乙丑新作太祖幄殿甲  
戌修寧夏竒徹埒佛事給鈔二百一十二萬貫秋七月

戊寅命玄教宗師張留孫修醮事於崇真宮壬午立普  
定路屯田運和琳糧於扎昆倉以便邊軍甲申車駕將  
北巡調左右翊軍赴北邊浚井以知樞密院事瑪魯哈  
坦並為遼陽行省平章政事乙未以甘肅行省平章竒  
徹知樞密院事丙申中書平章政事魯喇呼罷降封安  
王溫都遜布哈為順陽王禁獻珍寶初製袞冕戊戌敕  
中外希賞自請者勿予庚子以江南行御史臺中丞廉  
恂為中書平章政事乙巳以知樞密院事額爾吉訥為

江西行省平章政事八月丁未朔嶺北省臣實都坐以

官錢犒軍免官詔復其職丙辰祔仁宗皇帝莊懿慈聖

皇后於太廟

按元史仁宗皇后本傳作至治二年崩祔廟紀未書崩而於此已書祔廟與傳不符

傳又有英宗即位尊為皇太后之文紀亦未載

戊午特們德爾以趙世延嘗劾

其姦誣以不敬下獄請殺之并究省臺諸臣不允丁卯

宮人官奴坐用日者請太皇太后榮星杖之籍其貲九

月甲申建壽安山寺給鈔千萬貫括興和馬以贍北部

貧民禁五臺山樵採罷上都嶺北甘肅河南諸郡酒禁

壬辰土番利族阿俄等五種寇成谷遣鞏昌總帥以兵討之循州溪蠻秦元吉為寇遣守將捕之庚子常澧州洞蠻貞公合諸洞為寇命土官追捕之甲辰遣茂扎木等使占城占臘龍牙門索馴象冬十月丁巳酉陽聳儂洞蠻田謀遠為寇命守臣招捕之戊午車駕還大都詔太常院臣曰朕將以四時躬祀太室宜與羣臣集議其禮此追遠報本之道毋以朕勞於對越而有所損其悉遵典禮庚申敕譯佛書乙丑如大護國仁王寺帝師請

以卓特巴嘉勒燦為土番宣慰司都元帥從之丙寅定  
恭謝太廟儀式丁卯為皇后作盃頂殿於上都己巳罷  
玉華宮祀睿宗登歌樂敕翰林院譯詔闕白中書庚午  
命拜珠督造壽安山寺癸酉流諸王阿拉克特穆爾於  
雲南十一月戊寅造至元鈔五千萬貫中統鈔二百五

十萬貫

按元典章造至元中  
統鈔在四月與此異

庚辰禁京城諸寺邸舍匿

商稅丁亥作佛事於光天殿戊子如隆福宮丁酉詔各  
郡建帝師帕克斯巴殿其制視孔子廟有加戊戌交趾



蠻儂志德寇脫零那乞等六洞命守將討之遣使閱實  
各行省戍兵已亥計京官俸鈔給米三分甲辰太常禮  
儀院擬進時享太廟儀式十二月乙巳朔詔以明年為  
至治元年減天下租賦二分包銀五分免大都上都興  
和三路差稅三年優復煮鹽煉鐵等戶二年開燕南山  
東河泊之禁聽民採取命官家屬流落邊遠者有司資  
給遣之其子女典鬻於人者聽還其家監察御史廉訪  
司歲舉可任守令者二人七品以上官有偉畫長策可

以濟世安民者實封上之士有隱居行義明治體不求  
聞達者有司具狀以聞丁未播州蠻蠻的羊籠等來降  
癸丑以天壽節預遣使修醮於龍虎山翰林學士呼圖  
克都哩譯進宋儒真德秀大學衍義帝曰修身治國無  
踰此書賜鈔五萬貫河南饑帝問其故羣臣莫能對帝  
曰良由朕治道未洽卿等又不盡心乃職委任失人致  
陰陽失和災害荐至自今各務勤恪以應天心毋使吾  
民重困壬戌召西僧年扎克策喇實赴京師教所過郡

縣肅迎乙丑禛星於回回司天監四十晝夜丙寅以典  
瑞院使庫春貝知樞密院事修祕密佛事於延春閣丁  
卯特們德爾拜珠言此者詔內外言得失今上封事者  
或直進御前乞令臣等開視乃入奏聞帝曰言事者直  
至朕前可也如細民輒訴訟者則禁之以大學衍義印  
本頒賜羣臣已已敕罷明年二月八日迎佛中書右丞  
茂巴爾罷為江西行省右丞以中書參知政事濟爾噶  
朗為右丞江南浙西道廉訪使薛處敬為中書參知政

事辛未拜珠進鹵簿圖帝以唐制用萬二千三百人耗財乃定大駕為三千二百人法駕二千五百人癸酉帝聞賀巴延母老憫之以所籍京兆田磴還其家

至治元年春正月丙戌帝服袞冕享太廟以左丞相拜珠亞獻知樞密院事庫春貝終獻詔羣臣曰一歲惟四祀使人代之不能致如在之誠實所未安歲必親祀以終朕身廷臣言祀事畢宜赦天下帝諭之曰恩可常施赦不可屢下遂命中書陳便宜事行之丁亥帝欲以元

夕張燈宮中參議中書省事張養浩上書諫帝遽命罷之曰有臣若此朕復何憂自今朕凡有過豈獨臺臣當諫人皆得言賜養浩帛二匹二月丁巳監察御史觀音保索約勒哈陶默色成珪李謙亨諫造壽安山佛寺殺觀音保索約勒哈陶默色杖珪謙亨竄於尼嚕罕地甲子置承徽寺割常州宜興民四萬戶隸之丁郊以僧法洪為釋源宗主授榮祿大夫司徒禁越臺省訴事三月辛巳車駕如上都遣使賜西番薩斯嘉地僧金二百五

十兩銀二千二百兩袈裟二萬幣帛旛茶各有差壬午遣呪師多爾濟往伊濟巴勒布二國取佛經癸未製御服珠袈裟乙酉寶集寺金書西番波若經成置大內香殿辛丑以特克寶為御史大夫佩金符領忠翊侍衛親軍都指揮使夏四月己未造象駕金脊殿戊辰敕賜特們德爾父祖碑命宦者博羅台為太常署令太常官言刑人難與大祭遂罷之五月丙子毀上都回回寺以其地營帝師殿壬午遷武宗子圖卜特穆爾於瓊州禁日

者毋交通諸王駙馬掌陰陽五科者毋泄占候辛卯作  
行殿於縉山流杯池己未命世家子弟成童者入國學  
辛丑太常禮儀院進太廟制圖六月癸卯朔日有食之  
作金浮屠於上都藏佛舍利乙卯以特們德爾領宣政  
院事丁巳參知政事敬儼罷為陝西行御史臺中丞辛  
酉趙弘祚等以言事勒歸鄉里仍禁妄言時政乙丑遣  
使往銓江浙江西湖廣四川雲南五省邊郡官選己巳  
以上都留守濟爾噶朗為中書平章政事秋七月辛巳

蓋屋縣僧圓明作亂遣樞密院判官章台督兵捕之丙申禁服色踰制庚子修上都城郟陽道士劉志先以妖術謀亂命章台捕之八月壬寅修都城戊申上都蓋頂殿成乙卯中書平章政事特穆爾圖罷為上都留守壬戌車駕駐蹕興和左右以寒甚請還京師帝曰兵以牛馬為重民以稼穡為本朕遲留蓋欲馬得芻牧民得刈獲一舉兩得何計乎寒九月丁酉車駕還大都冬十月辛丑朔修佛事於大內妖僧圓明等伏誅癸丑敕翰林



集賢官年七十者毋致仕以內郡水罷不急工役敕蒙  
古子女鬻為回回漢人奴者官收養之禁中書掾曹毋  
泄機事命樞密遣官整視各郡兵馬己遣雅克特穆  
爾巡邊十一月乙亥如大護國仁王寺戊寅羣臣上尊  
號曰繼天體道敬文仁武大昭孝皇帝辛己命御史大  
夫特克實領左右阿蘇衛癸己以營田提舉司徵酒稅  
擾民命有司兼權丙申敕立故丞相安圖碑於保定新  
城十二月辛丑立伊奇哩氏為皇后甲寅如西僧灌頂

寺已未封索諾木藏布為白蘭王甲子命帝師恭嚙諾爾布喇實買勒燻巴勒藏布詣西番受具足戒賜金千三百五十兩銀四千五十兩幣帛萬匹鈔五十萬貫復以馮嘉努為司徒乙丑治銅五十萬觔作壽安山寺佛像二年春正月甲戌禁漢人執兵器出獵及習武藝丁丑親祀太廟始陳鹵簿賜導駕耆老幣帛戊寅敕有司存恤孔氏子孫貧乏者辛巳敕臺憲用人勿拘資格癸未建行殿於柳林封塔齊爾為蘭國公癸巳以西僧羅卜

藏為司徒二月庚子置左右欽察衛親軍都指揮使司  
命拜珠總之罷上都歇山殿及帝師寺役癸卯以江南  
行臺御史大夫竒徹為中書平章政事江浙行省參政

王居仁為中書參知政事

按宰相表竒徹拜平章政事  
在五月王居仁為參知政事

在閏五月  
與紀異

薛處敬罷為河南行省左丞甲寅以太廟役

軍造流杯池行殿廣海郡邑官曠員敕願往任者陞秩  
二等乙卯以遼陽行省平章政事瑪魯為中書平章政

事

按瑪魯為平章政事宰  
相表作四月與紀異

西僧伊實拉默特藏布疾詔

為釋大辟囚一人笞罪二十人三月己巳中書省臣言  
國學廢弛請令中書平章政事廉恂參議中書事張養  
浩都事富珠哩朶董之外郡學校仍命御史臺翰林院  
國子監同議興舉從之敕四宿衛興聖宮及諸王部勿  
用南人辛未禁捕天鵝違者籍其家壬申復張珪司徒  
丙戌以親祀禮成賜與祭者幣普減內外官吏一資復  
置市舶提舉司於泉州慶元廣東三路禁子女金銀絲  
綿下番己丑命有司建穆呼哩祠於東平仍樹碑庚寅

命將作院更製冕旒辛卯遣御史錄囚壬辰給宗仁衛  
蒙古子女衣糧丁酉如柳林駙馬許納之子蘇克訴曰  
臣父謀叛臣母私從人帝曰人子事親有隱無犯今有  
過不諫乃復告訐命誅之夏四月戊戌朔車駕如上都  
乙丑中書省臣請節賞賚以紓民力帝曰朕思所出倍  
於所入出納之際卿輩宜慎之朕當撙節其用五月己  
巳修滹沱河堤庚辰置營於永平收養蒙古子女遣使  
諭四方匿者罪之癸未以御史大夫托克托為江南行

臺御史大夫置宗仁衛蒙古侍衛親軍都指揮使司甲  
申車駕如五臺山以濟爾噶朗為御史大夫乙酉以拜  
珠領宗仁衛蒙古侍衛親軍都指揮使司事佩三珠虎  
符戊子禁民集衆祈神丙申以吳全節為玄教大宗師  
特進上卿閏月戊戌封諸葛忠武侯為威烈忠武顯靈  
仁濟王癸卯禁白蓮佛事戊申以特們德爾子同知樞  
密院事巴勒丹知樞密院事壬子作紫檀殿丙寅封公  
主蘇喀巴拉乳母為順國夫人六月丁卯朔車駕如五

臺山禁扈從宿衛毋踐民禾癸酉申禁日者妄談天象  
丙子修渾河堤秋七月壬子遣親王色徹圖總兵北邊  
戊午車駕次應州曲赦金城縣囚徒辛酉次渾源州中  
書左丞張思明坐罪杖免籍其家甲子錄京師諸役軍  
匠病者千人各賜鈔遣還南康路及廬州大水命有司  
賑之八月甲戌帝次奉聖州戊寅詔畫蠶麥圖於盪頂  
殿壁曰以時觀之可知民事庚寅特們德爾死九月

王按

圻續通考九月丙申朔日食  
元史紀未載天文志亦闕書

辛亥幸壽安山寺賜監役

官鈔人五千貫丙辰太皇太后崩庚申敕停今年冬祀  
南郊冬十月丙子江南行臺大夫托克托坐請告未得  
旨輒去職杖謫雲南己丑以拜珠為中書右丞相十一  
月甲午朔日有食之己亥以立右丞相詔天下流民復  
業者免差稅三年站戶貧乏鬻賣妻子者官贖還之凡  
差役造作先科商賈末技富實之家以優農力戊申御  
史李端言朝廷雖設起居注所錄皆臣下聞奏事目帝  
之言動宜悉書之以付史館從之乙卯遣西僧果爾卓



幹迎帝師己未置八番軍民安撫司改長官所二十有八為州縣十二月丁卯中書平章政事瑪魯罷為大司

農廉恂罷為集賢大學士以集賢大學士張珪為中書

平章政事

按宰相表廉恂罷在十一月張珪為平章政事在三年正月與紀異

甲戌特們

德爾子宣政院使巴爾斯濟蘇坐受劉夔冒獻田地伏

誅仍籍其家庚辰以知樞密院事奇徹台為宣政院使

參知政事蘇蘇為中書左丞宗仁衛侍衛親軍都指揮

使瑪喇勒為參知政事癸未以御史大夫濟爾噶朗知

樞密院事封色徹圖為武寧王授金印以地震日食命  
中書省樞密院御史臺翰林集賢院集議國家利害之  
事以聞弛河南陝西等處酒禁禁近侍奏取沒入錢物  
辛卯西僧灌頂疾請釋囚帝曰釋囚祈福豈為師惜朕  
思惡人屢赦反害善良何福之有宣徽院臣言世祖時  
鴻吉哩歲輸尚食羊二千成宗時增為三千今請增五  
千帝不許曰天下之民皆朕所有如有不足朕當濟之  
若加重賦百姓必致困窮國亦何益命遵世祖舊制

三年春正月壬寅以行中書省平章政事復兼總軍政  
軍官有罪重者以聞輕者就決罷上都雲州興和宣德  
蔚州奉聖州及雞鳴山房山黃蘆三义諸金銀冶聽民  
採鍊以十分之三輸官授前樞密院副使吳元珪王約  
集賢大學士翰林侍講學士韓從益昭文館大學士並  
商議中書省事拜珠言前集賢侍講學士趙居信直學  
士吳澄皆有德老儒請徵用之帝喜曰卿言適副朕心更  
當搜訪山林隱逸之士遂以居信為翰林學士承旨澄

為學士甲辰遣諸王呼喇珠鎮雲南辛亥申命特克實  
振舉臺綱壬子靜江邕柳諸郡獠為寇命湖廣行省督  
兵捕之甲寅以宗仁衛蒙古子女額足萬戶命罷收之  
乙卯征東摩濟地沃濟戶以貂鼠水獺海狗皮來獻詔  
存恤三歲丙辰泉州民留應總作亂命江浙行省遣兵  
捕之丁巳定封贈官等秩辛酉四川行省平章政事趙  
世延為其弟訟不法事繫獄待對其弟逃去詔出之仍  
著為令逃者百日不出則釋待對者敕常調官外不次

銓用者但升以職勿升其階二月癸亥朔定軍官襲職  
嫡長子孫幼者令諸兄弟姪攝之丙寅遣嘉璋等往西  
番徵畜牧治郵傳癸酉畋於柳林辛巳造五輅格例成  
凡二千五百三十九條名曰大元通制頒行天下丙戌  
京師饑發粟二萬石賑糶造五輅旗丁亥敕金書藏經  
二部命拜珠等總之戊子封鷹師布哈為趙國公辛卯  
以太子賓客巴圖廉貧賜鈔十萬貫三月壬辰朔車駕  
如上都丁未西番藏布凌諸族叛敕鎮西武靖王綽斯

本等發兵討之辛亥以圓明王道明之亂禁僧度牒符籙丙辰敕醫卜匠官居喪不得去職七十不聽致仕子孫無蔭叙能紹其業者量材錄用夏四月壬戌朔敕天下諸司飯僧誦經十萬部己巳浚金水河甲戌命張珪及右司員外郎王士熙勉勵國子監學敕都功德使科爾羅至京師釋囚大辟三十一人杖五十七以上者六十九人放籠禽十萬令有司償其直己卯詔行助役法遣使考視稅籍高下出田若干畝使應役之人更掌

之收其歲入以助役費官不得與敕京師萬安慶壽聖  
安普慶四寺揚子江金山寺五臺萬聖祐國寺作水陸  
佛事七晝夜丁亥故羅羅斯宣慰使述古妻漂末權領  
司事遣其子娑住邦來獻方物五月辛丑以特克實獨  
署御史大夫事壬寅詔中外開言路戊申監察御史蓋  
繼元宋翼言特們德爾姦險貪污請毀所立碑從之仍  
追奪官爵及封贈制書戊午奉元行宮正殿災上都利  
用監庫火帝語羣臣曰世皇始建宮室垂數十年至朕

而燬皆朕不能圖治之故也有欽察衛戍卒累功請賞以官帝曰名爵豈賞人之物命賜鈔三千貫六月戊辰毀特們德爾父祖碑追收原受制書告諭中外贈乳母呼圖克臺定襄郡夫人其夫阿拉追封定襄王謚忠愍癸酉置太廟夾室賜楊珠濟達台吉為襄安王太常請纂修累朝儀禮從之乙酉諸王徹伯爾遣使來降帝曰朕非欲彼土地人民但吾民不罹邊患軍士免於勞役斯幸矣今既來降當厚其賜以安之秋七月辛卯朔宣



政使竒徹台自傳旨署事中書以體制非宜請通行禁止從之乙巳招諭左右兩江黃聖許岑世興已酉封諸

王呼圖克特穆爾為威遠王

按諸王表威遠王名巴圖特穆爾與紀異

授金

印減海道歲運糧二十萬石并免江淮增科糧丙辰籍

特們德爾家貨諸王齊齊克圖入朝請印帝以其政績

未著不允賜鈔二十五萬貫御史臺請降旨開言路帝

曰言路何嘗不開但卿等選人未當爾八月癸亥車駕

南還駐蹕南陂是夕御史大夫特克實知樞密院事額

森特穆爾等謀逆以特克實所領阿蘇衛兵為外應殺丞相拜珠遂弑帝於行幄年二十一從葬諸帝陵謚曰睿聖文孝皇帝廟號英宗國語曰格根皇帝英宗性剛明嘗以地震減膳徹樂避正殿近臣有稱觴賀者叱曰朕方修德不暇汝為大臣不能匡輔反為諂耶拜珠進曰地震乃臣等失職宜求賢以代帝曰毋多遜此朕之過也嘗戒羣臣曰卿等居高位食厚祿當勉力圖報苟或貧乏朕不惜賜汝若為不法則必刑無赦巴爾斯濟

蘇下獄謂左右曰法者祖宗所制非朕所得私巴爾  
斯濟蘇雖事朕日久今有罪當論如法嘗御盞頂  
殿謂拜珠曰朕以幼冲嗣承大業錦衣玉食何求  
不得惟我祖宗櫛風沐雨戡定萬方曾有此樂耶  
卿元勲之裔當體朕至懷毋忝爾祖拜珠頓首對  
曰創業惟艱守成不易陛下睿思及此億兆之福  
也其明斷多類此然以果於刑戮姦黨畏誅遂構

大變云

伏讀通鑑輯覽

批謂英宗當特們德爾結黨肆恣之時並未稍加詰究僅於其身後奪爵籍產而其黨亦槩不為窮治未免姑息養姦以致釀成禍亂史臣無識轉以果於刑戮為辭其何以垂按法懲惡之道乎謹錄識之

英宗至治三年

欽定四庫全書

欽定續通志卷六十六

元紀十

泰定帝

泰定皇帝諱伊蘇特穆爾裕宗之孫晉王噶瑪拉長子也初世祖太子珍戩生三子長曰噶瑪拉次曰達爾瑪巴拉三郎成宗達爾瑪巴拉先薨世祖封噶瑪拉為晉王出鎮北邊統領太祖四大鄂爾多及軍馬達勒達國

土大德六年晉王薨帝襲封仍鎮北邊成宗武宗仁宗之立咸與翊戴有盟書賜南康路六萬五千戶為食邑英宗時所部告饑賑鈔百萬貫後遣使以地七千頃歸朝廷請有司徵租歲給糧鈔執藩臣禮甚謹先是王府內史都爾蘇得幸於帝常偵伺朝廷事機以其子哈克織事丞相拜珠得入宿衛久之哈克織脫歸言御史大夫特克寶與拜珠意相忤欲傾害之至治三年三月宣徽使塔坦來王邸為都爾蘇言主上將不利於晉王由

此二人深相要結八月二日帝獵於圖喇之地特克實

密遣烏魯斯來告曰我與哈克繖額森特穆爾實達爾

謀已定事成推立王為皇帝

按續宏簡錄實達爾下尚有章台一人考章台亦於

下十月被誅其與謀可知紀失載

帝大驚命囚烏魯斯遣巴勒密實特

等赴上都以逆謀告未至英宗遇弒於是諸王諳達布

哈及額森特穆爾奉皇帝璽綬來迎九月癸巳即位於

龍居河

伏讀通鑑輯覽

批謂晉王初因烏魯斯而告逆謀正也及聞英宗遇弒即當入朝討賊以伸大義乃因逆黨奉迎遽踐大位後雖從

夏勞之請駢戮羣兇惟計彰一己之善名不務戢  
國家之大難律以春秋直筆其能免耶謹錄藏之 頒蒙古

詔大赦以知樞密院事淇陽王額森特穆爾為中書右  
丞相諸王伊魯特穆爾襲封安西王甲午以內史都爾  
蘇為中書平章政事奈瑪台為中書右丞特克實知樞  
密院事巴蘇呼同知樞密院事博囉為宣徽院使舒瑪  
爾節為宣政院使乙未以樞密院副使阿薩爾為御史  
中丞內史舒蘇為中書左丞丁酉以鄂勒哲知樞密院  
事圖們同簽樞密院事戊戌以薩題勒密實知樞密院



事章台同知樞密院事己亥敕諭百司凡銓授官遵世  
祖舊制惟樞密院御史臺宣政院宣徽院得自奏聞餘  
悉由中書辛丑以茂穆蘇知樞密院事實達爾為大司  
農召諸王官屬流徙遠地及還原籍者二十四人還京  
師冬十月癸亥修佛事於大明殿甲子誅逆賊額森特  
穆爾鄂勒哲索諾木圖們等於行在所以舒瑪爾節為  
中書右丞相陝西行中書省左丞相圖魯通政院使寧  
珠並為御史大夫蘇蘇為御史中丞遣舒瑪爾節寧珠

誅逆賊特克實實達爾齊勤特穆爾托和齊章台等於  
大都並戮其子孫籍入家產壬申以內史阿勒坦綽克  
為太師知樞密院事丙戌以江浙行省平章政事額卜  
德呼勒為中書平章政事十一月己丑朔車駕次中都  
修佛事於昆剛殿辛丑車駕至大都丁未御大明殿受  
諸王百官朝賀癸丑遣使請曲阜以太牢祀孔子祭道  
甲五福神丁巳詔有罪自首者槩與原宥十二月己未  
御史臺經歷多爾濟巴勒御史寶勒塔克諤都瑪克額

森呼圖克並坐黨特克實免官御史言曩者特們德爾  
專政誣殺楊多爾濟蕭拜珠賀巴延觀音保索約爾哈  
陶默色黥竄李謙亨成珪罷免王毅高昉張志弼四川  
行省平章趙世延受禍尤慘天下咸知其冤請昭雪之  
詔存者召還錄用死者贈官有差庚申以宦者噶達爾  
為中政院使壬戌沒鎮江路漕河及練湖役丁萬三千  
五百人戊辰追尊皇考晉王噶瑪拉曰光聖仁孝皇帝  
廟號顯宗皇妣晉王妃曰宣懿淑聖皇后庚午遣使祀

海神天妃盜入太廟竊仁宗及莊懿慈聖皇后金主壬申作仁宗主仍督有司捕盜乙亥太常院臣言世祖以來太廟歲惟一享先帝始復古制一歲四祭請裁擇之帝曰祭祀大事也朕何敢簡其禮命仍四祭監察御史托克托趙成慶等言特門德爾在先朝包藏禍心離間親藩誅戮大臣使先帝孤立卒罹大禍其子索諾木親與逆謀久追天憲乞正其罪伊嚕托克托哈蘇台皆特克實之黨不宜寬宥遂並伏誅丙子命嶺北守邊諸王

齊齊克圖月修佛事以却寇兵已卯命僧作佛事於大  
內以厭雷癸未流逆黨諸王伊嚕特穆爾於雲南諳達  
布哈於海南庫魯克布哈於尼嚕罕博囉及烏魯斯布  
哈於海島丙戌舒瑪爾節言南坡之變諸王邁努逃赴  
潛邸願効死力且請誅戮元兇上契聖衷嘗蒙獎諭今  
臣等議宗戚之中能自拔逆黨盡忠朝廷者惟有邁努  
請加封賞以示激勸遂以泰寧縣五千戶封邁努為泰  
寧王知樞密院事大司徒庫春貝授開封儀同三司以

前太師巴古高議軍國重事丁亥議賞討逆功賜舒瑪爾節金十錠銀三十錠鈔七十錠都爾蘇為中書左丞相知樞密院事茂穆蘇御史大夫寧珠宣政院使索多並加授光祿大夫仍賜金銀鈔有差塑瑪哈噶拉佛像於延春閣之徽清亭詔以明年為泰定元年免大都興和差稅三年八番思播兩廣洞寨差稅一年江淮瓶科包銀三年四川雲南甘肅秋糧三分河南陝西遼陽絲鈔三分除虛增田稅免鄂拓克逋錢賑恤雲南廣海八

番等處戍軍求直言賜高年帛禁獻山場湖泊之利定  
吏員出身者秩許至四品

泰定元年春正月乙未以奈瑪台為平章政事舒蘇為  
右丞壬寅命僧諷西番經於光天殿甲辰敕譯列聖制  
詔及大元通制刊本賜百官戊申八番生蠻章光正等  
及楊黃五種人以其戶二萬七千來附置長官司以撫  
之己酉命諸王遠徙者悉還其部召親王圖卜特穆爾  
於瓊州阿穆爾克於大同甲寅敕高麗王還國仍歸其

印二月丁巳朔作顯宗影堂甲子作佛事命僧百八人  
及倡優百戲導帝師游京城庚午選守令推官舊制臺  
憲歲舉守令推官二人有罪連坐至是言其不便復命  
中書於常選擇人用之甲戌江浙行省左丞趙簡請開  
經筵及擇師傅令太子及諸王大臣子孫受學遂命平  
章政事張珪翰林學士承旨和塔拉都哩默色學士吳  
澄集賢直學士鄧文原以帝範資治通鑑大學衍義貞  
觀政要等書進講復敕右丞相舒瑪爾節兼領之三月



丁亥朔以同知宣政院事楊廷玉為中書參知政事乙未以江西行省平章政事額爾言訥知樞密院事給蒙古流民糧鈔遣還所部有擅徙者斬藏匿者杖之中書省臣請禁橫奏賞賚及踰越奏事者從之庚子竒徹罷為陝西行臺御史大夫以四川行中書省平章政事囊嘉特兼宣政院使往征西番寇藏布凌癸卯命中書平章政事奈瑪台攝祭南郊知樞密院事庫春貝攝祭太廟以冊皇后皇太子告丙午御大明殿冊鴻吉哩氏為

皇后皇子喇寶晉巴為皇太子己酉以皇子巴特瑪雅爾藏布嗣封晉王遣湘寧王巴拉寶哩出鎮察罕淖爾罷宣慰司立王傳府以知樞密院事額爾吉訥為雲南行省右丞相召流人還京師夏四月辛酉親王圖卜特穆爾至自潭州甲子車駕如上都以諸王庫春布哈寶喇平章政事額卜德呼勒右丞舒蘇等居守以嶺北行中書省左丞普爾普為中書左丞江南行臺中丞托多為中書參知政事瑪喇勒罷為太史院使發兵民築渾

河堤癸酉以太子詹事圖們岱爾為中書平章政事庚辰以風烈月食地震手詔至大都戒飭百官五月丁亥監察御史董鵬南等言平章奈瑪台宣徽院使特穆爾布哈詹事圖們岱爾黨附逆徒有虧臣節太常守廟不謹遼王擅殺宗親布哈濟蘭矯制亂法皆蒙寬宥甚為失刑乞定其罪以銷天變不允己丑帝諭都爾蘇曰朕即位以來無一人能執成法為朕言者知而不言則不忠且陷人於罪自今凡有所知宜悉以聞使朕明知法

度斷不敢自縱非獨朕身凡天下一切政務能守法以  
行則衆皆安反是則天下罹於憂苦又曰凡事防之  
於小則易救之於大則難爾其以朕言明告於衆俾知  
所慎壬辰省臣以災異屢見皆抗疏乞罷帝曰卿等皆  
辭去國家大事朕孰與圖優詔慰留之戊戌遷列聖神  
主於太廟新殿丙午侍御史高奎上書請求直言辨邪  
正明賞罰帝善其言賜以銀幣癸丑以中書平章政事  
圖門岱爾領宣徽使詹事丞和請如裕宗故事擇名

儒輔太子敕中書省臣訪求以聞六月戊午雲南蒙化  
州高蘭神場寨主照明羅九等寇威楚庚申張珪至上  
都以守臣集議事言逆黨未討姦惡未除忠憤未雪寃  
枉未理政令不信賞罰不公賦役不均財用不節請裁  
擇之不允癸亥作禮拜寺於上都及大同路給鈔四萬  
錠丙寅廣西兩江土官黃聖許岑世興乞遣其子弟朝  
貢許之丁卯大幄殿成作鎮雷坐靜佛寺癸酉帝受佛  
戒於帝師己卯詔疏決繫囚存恤軍士免天下和買雜

役三年蠲戶差稅一年百官四品以下普覃散官一等  
三品遞進一階遠仕瘴地身故不得歸葬妻子流落者  
有司資給還鄉仍著為令秋七月丙戌思州平茶楊大  
東酉陽州冉世昌寇小石耶凱江等寨調兵捕之作楠  
木殿庚子諸王巴延特穆爾出鎮庫稜東部喇特納寶  
哩出鎮沙州各賜鈔三千錠薩題勒密實率衛士佐太  
師阿勒坦綽克行邊賜鈔千錠癸卯罷廣州福建等處  
採珠蠶戶為民仍免差稅一年丙午以輝和爾字譯西

番經丁未以山東鹽運司判官馬合謨為吏部尚書佩  
虎符翰林修撰楊宗瑞為禮部郎中佩金符奉郎位詔  
往諭安南中書省臣言東宮衛士先朝止三千人今增  
至萬七千請命詹事院汰去仍依舊制從之八月乙卯

敕以刑獄復隸宗正府依世祖舊制刑部勿與

按元史  
刑法志

元世祖時宗正府置札爾古齊理諸王駙馬蒙古色目  
人姦盜詐偽及漢人雜犯仁宗時罷之至是增札爾古  
齊為四十二員復世祖舊制元紀  
統言之似刑部際不與刑獄矣 庚午作中宮金脊殿

辛未繪帝師帕克斯巴像十一頌各行省俾塑祀之敕

武官坐罪制授者以聞敕授者從行省處決丁丑罷浚  
玉泉山河役車駕至大都癸未敕樞密役軍凡三百人  
以上奏聞九月乙酉封伊蘇伯奇為荆王辛卯罷哈斯  
德濟魯斯本布總統所更置臨洮總管府乙巳昭獻元  
聖皇后忌日修佛事飯僧萬人敕存恤武衛軍一年冬  
十月戊午立壽福總管府典累朝神御殿祭祀庚申命  
左右相日直禁中有事則赴中書壬申真州珠金沙河  
松江府吳江州諸河淤塞詔所在有司備民丁浚之丁



丑封親王圖卜特穆爾為懷王十一月癸巳遣兵部員  
外郎宋本吏部員外郎鄭立鄂爾和工部主事張成太  
史院都事費著分銓閩海兩廣四川雲南選己亥以準  
台知樞密院事辛丑造金寶蓋飾以七寶貯佛舍利甲  
辰作歇山盃頂樓於上都十二月癸丑朔以岑世興為  
懷遠大將軍遂授沿邊溪洞軍民安撫使佩虎符仍來  
安路總管黃聖許為懷遠大將軍遂授沿邊溪洞軍民  
安撫使佩虎符致仕其子志熟襲為上思州知州降詔

宣諭仍各賜弊帛二乙邠雲南徭阿吾及歪闌為寇行  
省督兵捕之癸亥鹽官州海水溢屢壞隄障侵城郭遣  
使祀海神仍與有司視形勢所便還請疊石為塘詔曰  
築塘是重勞吾民也其增石固扞禦庶天其相之辛未  
新作梭殿成乙亥曲赦重囚三十八人為三官祈福  
二年春正月乙未禁后妃諸王駙馬母通星術之士非  
司天官不得妄言禍福中書省臣言江南民貧僧富諸  
寺觀田土非未舊置并累朝所賜者請仍舊制與民均

役從之戊戌藏布凌來降辛丑懷王圖卜特穆爾出居  
建康戊申以策喇寶班班巴爾藏布為土番等路宣慰使  
都元帥往鎮藏布凌之地庚戌詔諭宰臣曰向者珠爾  
罕楚古爾蘇及山後皆地震內郡大小民饑朕惟太祖  
開創之艱世祖混一之盛期與人民共享安樂常懷祇  
懼災沴之至莫測其由豈朕思慮有所不及而事或僭  
差天故以此示儆其與諸司集議便民之事定議以開  
閏月壬子朔大赦除江淮朔科包銀免被災地差稅一

年庚申修野狐色澤柔乾三嶺道丁卯中書省臣言國  
用不足請罷不急之費從之置惠遠倉永需庫於哈喇  
圖總管府己巳修濬沱河堰壬申罷永興銀場聽民採  
鍊以十分之二輸官罷松江都水庸田使司命州縣正  
官領之仍加無知渠堰事癸酉作棕毛殿己卯山東廉  
訪使許師敬請頒族葬制禁用陰陽相地邪說二月丙  
戌頒道經於天下名山宮觀丁亥平伐苗酋率其戶十  
萬來降自請入覲從之己丑加嗣漢天師張嗣成太玄

輔化體仁應道大真人己亥封阿爾默色為和國公張

珪為蔡國公仍知經筵事以中書右丞舒蘇為平章政

事

按宰相表舒蘇為平章政事在五月與紀異

參知政事普爾普為右丞御

史大夫圖古勒加太保仍御史大夫庚子姚煒以河水

屢決請立行都水監於汴梁倣古法備捍仍命瀕河州

縣正官皆兼知河防事從之戊申命道士祭五福太一

神三月癸丑修曹州濟陰縣河堤役民丁一萬八千五

百人甲寅禁捕天鵝辛酉咸平府清河寇河合流失故

道壞堤堰救蒙古軍千人及民丁修之乙丑車駕如上  
都夏四月癸巳敕宿衛馳馬散牧民間者歸官廐飼之  
丁未封后父浩里烏齊爾為威靖王戊申以許師敬為  
中書左丞中政使馮亨為中書叅知政事仍中政使五  
月壬子車里陶刺孟及大阿哀蠻兵萬人乘象寇陷朶  
刺等十四寨木邦路蠻八廟率變夷萬人寇陷例八漢  
寨督邊將嚴備之癸酉融州否泉洞吉龍洞洞村山黑  
江諸徭為寇廣西元帥府發兵討之丙子舒瑪爾節等

以國用不足請減廩馬汰衛士及節諸王濫賜從之置

諫議書院於昌平祀唐劉蕡六月癸未潯州平南縣獠

作亂

按平南史文誤作平甫今據地理志改

達嚕噶齊都爾嘉都監姚泰

亨死之丙申中書叅政左塔布台言大臣每領軍務前

古所無特克寶以御史大夫額森特穆爾以知樞密院

事皆領衛兵如虎而翼故成逆謀今軍衛之職乞勿以

大臣領之庶勲舊之家得以保全從之仍賜幣帛以旌

其直丁酉息州民趙丑廝郭布薩妖言彌勒佛當有天

下有司以聞命宗正府刑部樞密院御史臺及河南行  
省官雜鞫之丁未敕營造毋役五衛軍士止以武衛虎  
賁二衛給之秋七月庚戌遣阿爾薩巴祀宅神於北部  
行幄甲寅遣使奉詔分諭搖蠻鎮康路土官你囊謀粘  
路土官賽丘羅出降寧珠許師敬編類帝訓成請於經  
筵進講仍俾皇太子觀覽有旨譯其書以進戊午遣使  
代祀龍虎武當二山己未置車里軍民總管府以土人  
寒賽為總管佩金虎符癸亥修大乾元寺以許師敬及



郎中瑪魯兼經筵官廣西諸徭寇城邑遣湖廣行省左丞克楚兵部尚書李大成中書舍人瑪魯將兵討之以諸王烏爾圖罕監其軍海北徭酋盤吉祥寇陽春縣命江西行省督兵捕之庚午以國用不足罷書金字藏經封駙馬博囉特穆爾知樞密院事和斯並為郡王壬申御史臺臣言廉訪司從軍非世祖舊制賈胡鬻寶西僧修佛事所費不支於國無益並宜除罷從之敕太傅托迪太保圖古勒日至禁中集議國事八月戊子修上

都香殿辛丑敕諸王私入京者勿供其所用諸部曲宿衛私入京者罪之九月戊申朔分天下為十八道遣使宣撫分行諸道按問官吏不法詢民疾苦審理寃滯凡可以興利除害從宜舉行有罪者四品以上停職申請五品以下就便處決其有政績尤異暨晦跡丘園才堪輔治者具以名聞以郡縣饑詔運粟十五萬石貯瀕河諸倉以備賑救仍敕有司治義倉募富民入粟拜官不願仕者旌其門諸王沃濟遣使貢金浮圖已酉海運江

南糧百七十萬石至京師癸丑車駕至大都遣使祀海  
神天妃甲寅禁饑民結扁擔社傷人者杖一百著為令  
丁丑浚河間陳玉帶河冬十月戊寅朔岑世興及子特  
穆爾率衆寇上林等州命撫諭之癸未以都爾蘇為御  
史大夫乙未皇后額琳沁巴拉受佛戒於帝師丁酉廣  
西獠酋何童降請防邊自効從之十一月戊申周王和  
寶拉遣使以豹來獻丙辰郭布薩等伏誅詔並杖流其  
黨丁巳如大承華普慶寺祀昭獻元聖皇后於影堂賜

僧鈔千錠庚申廣西道宣慰使獲獠酋潘寶下獄其弟  
潘見遂寇柳州命湖廣行省左丞克楚捕之壬戌敕軍  
民官蔭襲者由本貫圖宗支申請銓授丙寅都爾蘇復  
為中書左丞相加開府儀同三司錄軍國重事壬申諸  
王烏爾圖罕遣使以追捕廣西獠寇上聞帝曰朕自即  
位累詔天下憫恤黎元惟廣徭屢叛殺掠良民故命烏  
爾圖罕等討之今聞迎降者甚衆宜更以恩撫之若果  
不悛嚴兵追捕勿縱十二月戊寅以達實特穆爾為中

書右丞相癸未加達實特穆爾開府儀同三司上柱國  
錄軍國重事監修國史封薊國公乙酉帝復受佛戒於  
帝師丁亥中書省臣言山東陝西湖廣地接戎夷請議  
選宗室往鎮從之申禁圖讖私藏不獻者罪之癸巳京  
師多盜達實特穆爾請處決重囚增調邏卒仍立捕盜  
賞格從之丁酉加寧珠知樞密院事與茂穆蘇並開府  
儀同三司壬寅右丞趙簡請行區田法於內地以宋董  
煇所編救荒活民書頒州縣

三年春正月丙午朔高麗國王王章遣使賀正旦

自世祖至

元二十一年正旦高麗使者不會至是復至然其後亦不數見云

播州蠻酋黎平慶等

來降壬子封諸王庫春布哈為威順王鎮湖廣邁努為

宣靖王鎮益都

按諸王表邁努封宣靖王作泰定二年與紀異

徵前翰林學士

吳澄不起置都水庸田司於松江掌江南河渠水利已

未以湘寧王巴拉實哩鎮俄羅斯部癸亥封圖烈訥為

國公以知樞密院事薩題勒密實為嶺北行中書省平

章政事戊辰緬國亂其主答里也伯遣使來乞師二月

庚辰命諸王羅本為大宗正壬午廣西全茗州土官許  
文傑寇茗盈州殺知州事李德卿等命湖廣行省督兵  
捕之以奈瑪台知樞密院事甲申祭太祖太宗睿宗御  
容於翰林國史院丁亥中書請罷征徭赦烏爾圖罕等  
班師其鎮戍者如故庚子以通政院使察納為中書平  
章政事甲辰車駕如上都命諸王諤特古布哈及中書  
省臣額卜德呼勒察納舒蘇許師敬托多居守三月乙  
巳朔帝以不雨自責命審決重囚遣使分祀五嶽四瀆

名山大川及京城寺觀丁未敕百官集議急務中書省  
臣等請汰衛士節濫賞罷營繕防猛寇諸寺官署坑冶  
等事歸中書並從之癸丑八番巖霞洞蠻來降願歲輸  
布二千五百匹設蠻夷官鎮撫之丁巳遣諸王實喇鎮  
北邊甲子命功德使司簡歲修佛事一百二十七丙寅  
翰林承旨額琳特穆爾許師敬譯帝訓成更名曰皇圖  
大訓辛未泉州民阮鳳子作亂寇陷城邑軍民官以失  
討坐罪夏四月丙戌鎮安路總管岑修廣為弟修仁所



攻來告命湖廣行省辨治之壬寅米洞蠻田先什用等  
結十二洞蠻寇長陽縣湖廣行省遣九姓長官招降之  
修夏津武河堤三十三所役丁萬七千五百人五月乙  
巳修鎮雷佛事三十一所罷福建歲供蔗餉以西僧馳  
驛擾民禁之甲寅八百媳婦蠻招南通遣其子招三聰  
奉方物來朝乙卯以帝師兄索諾木藏布領西番三道  
宣慰司事尚公主錫王爵給壽寧公主印仍賜田百頃  
缺三萬錠甲子中書會歲鈔出納之數請節用以補不

足從之丁卯岑世興及鎮安路岑修文合山獠角蠻六  
萬餘人入寇命湖廣雲南行省招諭之遣指揮使諤都  
瑪勒鐫西番咒語于居庸關崖石庚午克楚招諭永明  
縣五洞徭河西加水龍四部來降各立其土官領之六  
月癸未播州蠻黎平愛復叛合謝烏窮為寇宣撫使楊  
伊埒布哈招平愛出降烏窮不附命湖廣行省討之丁  
亥命湘寧王巴拉實哩出鎮阿南達實迪之地乙未命  
梁王旺沁及諸王齊齊克圖鎮撫北軍賜旺沁鈔五千

鉞幣帛各二百匹丁酉遣道士吳全節修醮事於龍虎  
三節閣皂三山己亥納皇姊壽寧公主女薩都巴拉于  
中宮秋七月甲辰車駕發上都禁車騎踐民禾造恭豹  
輶車三十兩丁未紹慶酉陽寨再世昌及何惹洞蠻入  
寇辛亥封阿都齊為綏寧王壬子皇后受雅滿達噶戒  
于水精殿甲寅如大乾元寺敕鑄五方佛銅像乙卯詔  
翰林侍講學士阿魯威直學士雅奇譯世祖聖訓以備  
經筵進講戊午敕入粟拜官者准致仕銓格乙丑發兵

修野狐色澤桑乾三嶺道庚午廣西宣慰副使王瑞請  
益戍兵及以土民屯田備蠻仍置南寧安撫司八月乙  
亥大天源延聖寺神御殿成甲午罷行宣政院及功德  
使司丁酉藩王保賽音遣使獻玉及獨峯駝以星變下  
詔恤民辛丑次中都畋於翁果察圖之地盪頂殿成作  
天妃宮于海津鎮九月辛亥命帝師還京修灑淨佛事  
于大明興聖隆福三宮庚申車駕至大都壬戌以察納  
領度支事戊辰湖廣雲南各寨土官奉方物來獻即其

地置木朵路木來州孟隆路及哀培各甸冬十月辛未  
朔癸辛四千治通州道甲戌寧珠陞右御史大夫癸未  
河水溢汴梁路樂利堤壞役丁夫六萬四千人築之賜  
大天源延聖寺吉安臨江二路田千頃十一月庚子陝  
西行臺中丞姚煒請集世祖嘉言善行以時省覽從之  
癸卯中書省臣言西僧每假元辰疏釋重囚有乖政典  
請罷之有旨自今當釋者敕宗正府審覆已酉作盂頂  
棕樓辛亥追復前平章政事李孟官乙卯廣西透江團

猺為寇宣慰使邁努諭降之扶靈青溪檫頭等洞蠻為  
寇湖南道宣慰司遣使諭降之戊午封諸王特穆爾布  
哈為鎮南王鎮揚州辛酉加御史大夫寧珠開府儀同  
三司己巳徙上都清寧殿于巴雅爾行宮十二月壬午

御史賈瑄請禘武宗皇后于太廟不報

按后妃傳載武宗皇后恭定四

年崩本紀稱是年請禘與傳不符

敕以來年元夕構燈山于內廷御史

趙師魯以水旱請罷其事從之甲申師魯又請親祀郊  
廟帝嘉納之丙戌以回回陰陽家言天變給鈔二千錠

施有道行者及乞人繫囚以禳之庚寅召江浙行省右丞趙簡為集賢大學士領經筵事癸巳作盂頂殿己亥命帝師修佛事釋重囚三人置大承華普慶寺總管府罷規筮提點所御史言比年營繕以衛軍供役廢武事不講請遵世祖舊制教習五衛親軍以備扈從不報湖廣屯戍千戶濟雅于布哈招諭扶靈洞蠻劉季等來降四年春正月乙巳御史臺臣請親祀郊廟帝曰朕遵世祖舊制其命大臣攝之壬子以中政院金銀鐵冶歸中

書靖安王扣布哈出鎮陝西庚申皇子允丹藏布受佛  
戒于智泉寺甲子武龍洞蠻寇武緣縣諸堡丁卯浚會  
通河築澗州護倉堤役丁夫三萬人二月乙亥親王額  
森特穆爾出鎮北邊丙子命伊拉齊領仁宗神御殿事  
大司徒額琳沁策喇實為大承華普慶寺總管府達嚕  
噶齊仍大司徒壬午狩于澗州諸王呼寶噶溫都爾出  
鎮北邊賜金銀幣鈔有差帝師燦默特伊實結卜姜楚  
卜扎卜卒命達實特穆爾寧珠監修佛事丙戌詔同簽



樞密院事雅克特穆爾教閱諸衛軍戊子進襲封衍聖  
公孔思晦階嘉議大夫以瑪古斯為雲南行省平章政  
事提調烏蒙屯田三月辛丑皇子允丹藏布出鎮北邊  
以諾海齊為惠國公商議內史府事丙午命西僧作止  
風佛事庚申遣使往江南求奇花異果辛酉以太傳托  
迪為太師太保圖古勒為太傅伊克扎爾古齊博迪蘇  
為太保敕前太師布呼與議大事食其俸終身召翰林  
學士承旨蔡國公張珪集賢大學士廢恂太子賓客王

毅悉復舊職陝西行臺中丞敬儼為集賢大學士並商議中書省事珪仍預經筵事中書省臣請酬哈克繖等累朝售寶價鈔十萬二千錠從之壬戌車駕如上都命親王巴拉寶哩出鎮察罕淖爾封庫春為國公以阿繼和卓知樞密院事渾河決發軍民萬人塞之夏四月辛未盜入太廟竊武宗金主及祭器壬申作武宗主癸巳高州徭寇電白縣千戶張額力戰死之甲午以西僧恭噶伊實巴忠喇實且勒燦巴勒藏布為帝師賜玉印仍

詔諭天下僧乙未以武備寺卿阿薩爾達爾罕為御史大夫五月辛丑太尉超爾卒甲子以典守宗廟不嚴罷太常禮儀院官丁卯修佛事于賀蘭山及諸行宮罷諸王分地州縣長官世襲俾如常調官以三載為考元江路總管晉雙坐賊免遂結蠻兵作亂敕復其舊職德慶路徭來降歸所掠男女悉給其親六月辛未翰林侍講學士阿嚕威直學士雅奇等進講仍命譯資治通鑑以進丁丑罷兩都營繕工役錄諸郡繫囚辛巳造象輿六

乘癸未遣察納巴延赴大都銓選甲申廣西花角蠻為  
寇命所部討之乙未紹慶路四洞酋阿者等降並命為  
蠻夷長官仍設巡檢司以撫之秋七月丁酉元江路普  
雙復叛己亥御史臺臣言內郡江南旱蝗荐至非國細  
故丞相達實特穆爾都爾蘇參知政事布哈史惟良參  
議邁努並乞解職慰遣之丁未敕經筵講讀官非有代  
不得去職甲寅遣使市旄牛於西城丙寅籍僧道有妻  
者為民塞保安鎮渠役民丁六千人八月癸酉奉元路

治中單鵠言令民抹捕珍禽異獸不便請罷之敕應獵者其捕以進乙亥苗人祭伯秧寇李陀寨命湖廣行省捕之乙酉巴雅爾鄂爾多作飲明殿成癸巳發衛軍八千修白浮羗山河堤九月丙申朔日有食之阿恰齊德濟獻木綿大行帳禁僧道買民田違者坐罪没其直甲子御史言廣海古流放之地請以職官贓污者處之以示懲戒從之閏月己巳車駕至大都壬申以災變大赦冬十月己酉以治書侍御史王士熙為參知政事丁巳

以御史中丞趙世延為中書右丞戊午命太常纂修累朝禮儀壬戌開南州土官阿只弄率蠻兵為寇雲南行省招捕之十一月庚午以思州土官田仁為思州宣慰使辛卯以降蠻謝烏窮為蠻夷官雲南蒲蠻來附十二月庚子定捕盜令限內不獲者償其贓乙卯祭國公張珪卒致和元年春正月甲戌命繪蠶麥圖乙亥詔諭百司凡不赴任及擅離職者奪其官避差遣者笞之御史鄒惟亨言時享太廟三獻官舊皆勲戚大臣而近以戶

部尚書為亞獻人既踈遠禮難嚴肅請仍舊制以省憂  
樞密宿衛重臣為之丁丑頒農桑舊制十四條于天下  
仍詔勵有司以察勤惰己卯帝將畋柳林御史王獻等  
以歲饑諫帝曰其禁衛士毋擾民家命御史二人巡察  
之戊子罷河南鐵冶提舉司免陝西撈鹽一年罷益都  
諸屬縣食鹽二月庚申改元免河南自實田糧一年被  
災州郡稅糧一年流民復業者差稅三年疑獄繫三歲  
不決者咸釋之三月庚午雲南安隆寨土官岑世忠與

其兄世興相攻籍其民三萬二千戶來附歲輸布三千匹請立宣撫司以總之不允置州一以世興知州事置縣二聽世忠舉人用之仍諭其兄弟共處立萬戶府二領征西紅胖襖軍達實特穆爾都爾蘇言災異未彌由官吏以罪黜罷者怨誅所致請量才叙用從之乙卯帝御興聖殿受無量壽佛戒于帝師甲申遣戶部尚書李嘉努往鹽官祀海神仍集議修海岸丙戌命帝師修佛事於鹽官州造浮屠二百一十六以厭海溢戊子車駕



如上都徙懷王圖卜特穆爾於江陵以趙世延知經筵  
事趙簡阿嚕威同知經筵事曹元用吳秉道虞集段輔  
馬祖常雅竒富珠哩朮並兼經筵官雲南土官撒加布  
降置州一以撒加布知州事隸羅羅宣慰司夏四月己  
亥達實特穆爾都爾蘇請凡蒙古色目人效漢法丁憂  
者除其名從之五月丙寅廣西普寧縣僧陳慶安作亂  
建國改元癸酉大理怒江甸土官阿哀你寇樂辰諸寨  
命雲南行省督兵捕之戊子以嶺北行省平章政事達

實特穆爾為中書平章政事秋七月庚午帝崩於上都  
年三十六葬起輦谷稱為泰定帝

終元之世不為帝立廟上諡故止稱泰定帝

泰定帝泰定四年致和一年凡五年

欽定續通志卷六十六